

**Pinerluttunut isumaginnittoqarfimmi suliassat  
arsaarinninnermut tunngasut suliarineqartarnerat pillugu  
nalunaarut (arsaarinnittarnermik nalunaarut)**

*Kalaallit Nunaanni pinerluttulerineq pillugu inatsimmi, tak. inatsit nr. 306, 30 april. 2008-meersoq, § 229, imm. 2, aamma § 245, imm. 4, naapertorlugit makku aalajangersarneqarput:*

**§ 1.** Suliassat arsaarinninnermut tunngasut suliarineqarneranni pigisat aningaasallu pineqartut inissiiffimmit paarineqarsinnaapput. Inissiiffik qinnuigineqarmigut inissitamut uppersaammik tunniussissaaq.

*Imm. 2.* Pigisat aningaasallu paarineqartut ingerlaavartumik nalunaarsuiffimmut sapinngisamik piaartumik nalunaarneqassapput, tak. § 4. Taakku isumannaatumik paarineqarnissaat inissiiffimmit isumagineqassaaq.

*Imm. 3.* Nasaanut inissiiffiup eqqaani nassaarineqartunut imm. 2 aamma atuupput.

**§ 2.** Pigisat aningaasalluunniit inissiiffimmit arsaarinnissutigineqanngitsut piginnittumut ingerlaannaq utertillugit tunniunneqassapput, taamaattorli tak. imm. 2 aamma 3.

*Imm. 2.* Piginnittoq pinerluttunut isumaginnittoqarfiup inissiisarfisa ilaanni inissinneqarsimappat pigisat pillugit nalunaarut naapertorlugu utertillugit tunniussisoqassaaq.

*Imm. 3.* Pigisat aningaasalluunniit makku pineqarpata politiinut tunniunneqassapput

- 1) nassaat imaluunniit
- 2) nassaarneq tunngavigalugu pinerluuteqartoqarneranik politiinut nalunaaruteqartoqarpat.

**§ 3.** Arsaarinnissutit naalagaaffiup karsianut iluaqutissanngortinneqassapput. Pigisat arsaarinnissutigineqartut inissiiffimmit atorneqarsinnaapput.

§ 4. Inissiisarfii tamarmik pigisat aningaasallu paarineqartut arsaarinnissutigineqartulluunniit pillugit ingerlaavartumik nalunaarsuiffeqassapput.

§ 5. Pinerluttulerineq pillugu inatsimmi § 229-mi maleruaqqusat malillugit aalajangiisoqannginnerani pissutsit aalajangiinermut tunngavigineqartut pillugit paasissutissanik naammaginartunik pissarsisoqassaaq. Suliami arsaarinnissuteqarnermi illuatungerisat allanit illersorneqarluni ikiorneqarsinnaanermik ilisimatinneqassaaq. Aammattaaq illuatungerisat paasissutissat pigineqartut, tassunga ilanngullugu nalunaarutiginninnerit killisiuisoqarsimappallu killisiuinerit pillugit ilisimatinneqassaaq aammalu illuatungerisat oqaaseqarnissaminut periarfissinneqassalluni, taamaattorli tak. § 6.

*Imm. 2.* Killisiuisoqarpat killisiorneqartoq nassuiaatimi imaqarniliornerannik akuersinissaminut periarfissinneqassaaq akuersisoqarsimanersorlu imaqarniliami allassimassalluni. Killisiuineq inissiiffimmi sulisunit marlunnit ingerlanneqassaaq.

*Imm. 3.* Allakkiortoqassaaq pisunik issuaanertalimmik, tassunga ilanngullugu nalunaarutininik killisiuisoqarsimappallu killisiuinerit aalajangiinermut tunngavigineqarsinnaasut pillugit imaqartumik. Aammattaaq aalajangigaq tassungalu tunngavilersuut allakkiami issuaavigineqassapput. Tunngavilersuutip imarissavai inatsisitigut maleruaqqusanut aalajangiinermi tunngavigineqartunut innersuussut aamma missingiinermi pingaarnertut mianerisassat sorliit aalajangiisuunersut, soorluttaaq pissusiviit aalajangiinermut pingaarutilittut sunniutillit allassimassasut. Aammattaaq allakkiap imarissavai makku pillugit paasissutissat,

- 1) aalajangiineq tamatumunngalu tunngavilersuut illuatungerisamut qaqugukkut nalunaarutigineqarsimanersut,
- 2) inatsisitigut maleruaqqusat sorliit naapertorlugit aalajangiisoqarsimanersoq pillugu illuatungerisat ilisimatinneqartoq,
- 3) Inissiiffiup aalajangigaasa Pinerluttunut Isumaginnittoqarfiup pisortaanut naammagittaalliuutigineqarnissaannut periarfissaq pillugu aammalu Pinerluttunut Isumaginnittoqarfiup pisortaanut naammagittaalliuuteqarnissamut ulloq suna killissarititaanersoq pillugu illuatungerisat ilitsersorneqarsimasoq, tak. pinerluttulerineq pillugu inatsimmi § 245, imm. 1, aamma
- 4) arsaarinnissutit nalingat sapaatip akunnerani ataatsimi sulisitaanermi aningaasarsiat inissitamut tunniunneqartartut qaangerpagu allaffissornikkut aalajangiussap eqqartuussivimmi misilinneqartussat

suliassanngortinneqarnissaanut periarfissaq pillugu illuatungerisaq ilisimatinneqarsimasoq, tak. pinerluttulerineq pillugu inatsimmi § 246, imm. 1, nr. 4, aamma § 253.

*Imm. 4.* Eqqartuunneqartup qinnuteqarneratigut allakkiaq imm. 3-mi taaneqartoq tunniunneqassaaq, taamaattorli tak. § 6.

**§ 6.** Inissitap imaluunniit inuit allat pisortalluunniit soqutigisaannut, assersuutigalugu inissiiffiup isumannaatsuunissaa imaluunniit inunnik ataasiakkaanik illersuinissaq eqqarsaatigalugu inissitap imminut iluaqutissami isumaginissaanut allakkiamik atuisinnaanermik soqutiginninnera aalajangiisuutinneqartussatut isigineqarsinnaappat suliamut tunngasunik takunnissinnaatitaaneq pisortat ingerlatsineranni suliat suliarineqartarnerannut inatsit naapertorlugu killilerneqarsinnaavoq.

*Imm. 2.* Pisortat ingerlatsineranni suliat suliarineqartarnerannut inatsimmi maleruaqqusat malillugit illuatungerisaq suliamut tunngasunik takunnissinnaatitaanngippat illuatungerisaq tusarniarneqassanngilaq.

**§ 7.** Nalunaarut manna ulloq 1. januar 2010 atuutilerpoq.

*Kalaallit Nunaanni Pinerluttunut Isumaginnittoqarfik, ulloq 7. december 2009*

THOMAS NICOLAISEN